

8 Յուլիս

Եթե պատուանշանի վաճառականություն ընել սովորություն եղած ըլլար՝ ամեն ամեն ասեմ ձեզ՝ տարուան մը մէջ Ռօջիլտի չափ հարուստ կը լինէի:

Ի՞նչպէս:

–Թուրքիայէն աժան գնով պատուանշան կ'առնէի, նաւերով Եւրոպա կը դրկէի, եւ միլիոնաւոր ոսկիներ կը քաշէի:

Վերջին օրերս շատերը հոս պատուանշան առին եւ շատ աժան գիներով... կարծեմ շատ առնողին տէրութիւնը պատրաստ է հարիւրին զեղջ մը ընել... ափսո՛ւ որ մեր պատուանշաններն ալ մեր արժէքուղթերուն պէս յարգ չունին Եւրոպիոյ մէջ...:

**

Շաբթոս արտաքին բերքն *ժեզվիթներն* են... շոգենաններն այս ապրանքէն կը բերեն մեզի առատութեամբ:

Եթե մաքսատան տնօրէն ըլլայի՝ ծանր տուրք մը կ'առաջարկէի ասոնց, որ մեր երկիրը չմտնեն:

Բայց այս մարդերը դրամ կու տա՞ն... ապրանքին տեսակէն հարիւրին տասը առնելու իրաւունք ունիս, կ'ըսեն, եւ տաս - տասնըհինգ *ժեզվիթ* կը թողուն մաքսատուն եւ կը հեռանան:

Մաքսատան տնօրէնութիւնն որո՞ւ ծախէ ասոնք. թաշկինակ, գուլպայ կամ գաւաթ չեն որ վաճառականներու ծախէ:

Ահա այնպիսի ապրանք մը, որ ոչ կ'առնուի եւ ոչ կը ծախուի... գոնէ իրենց մականունը փոխէին թշուառականները... Յիսուսեան... ի՞նչ անպատուութիւն Յիսուսի...

9 Յուլիս

Թնդանօթ նետեցէք...

Վերջապէս ազգային երեսփոխանական ժողովոյ բացումը տեղի պիտի ունենայ յառաջիկայ ուրբաթ օրը, յուլիսի 11 - ին: Բոլոր երեսփոխաններն հրաւիրուած են, ինչպէս որ սովորութիւն է, ներկայ գտնուիլ, ունայն խօսքեր ընել եւ իրենց ազգասիրական պարտքը կատարել:

Ս. Պատրիարքն պիտի բանայ ժողովն եւ բացման առթիւ պիտի խօսի հայ քաղաքականութեան վրայ: